

1 Corinthians

Paul Ana Fef Wantoro'ot Corinth Isah

Roube'aten Ana Tur

Paul ana fef wanatoro'ot Corinth isah kikirum, anayabin Corinth ekaleisia i wowab. Naatu tur nonowar wanawanahimaim i yababan gagamih maiyow himatar. Hai ma yawas naatu hai baitumatum i bi'afiy, imih ana fef kirum baibaisih isan. Nati ana veyamaim Corinth i Greek hai bar merar gagamin ta naatu sabuw tafaram wanawanan menan ta ta etei i nati'imaim hima'am. Rome wanawanan Corinth i tafaram Akaiya ana bar merar gagamin. Nati bar merar wanawanan bowabow yumatan ta ta hibowabow, yawas ta ta naatu kwafiren auman ta ta hima hisisinaf.

Tur abarayan ana not gagamin i mi'itube sabuw tibaisih. Anayabin Corinth ekaleisia wanawanahimaim i kouseb mamatar, hibiwa'an kwanekwan, tabin wanawanan hibiwa'an kwanekwan, not gaigiwas sinaf i men ma'am, kwafiren wanawanan hiwewesar, Anun Kakafiyin ana usar bitih ana ef hisasa'ir. Naatu morobone misir maiye isan hikakasiy etei i sinaftobon tur gewasinamaim kubunabuna hai tur eowen.

Naatu teten 13 wanawanan God ana yabow siwar etei tafahimaim, ana sabuw bitih isan auman eo hinowar. Naatu kirisian sabuw i yabowamaim hinama hinabow.

Fef wanawanan tur iti na'atube hi'asgidigid

Roube'aten ana tur (1.1-9)

Gamin ekaleisia wanawanahimaim (1.10–4.21)

Baiwa'an kwanekwan naatu orot ana nibur bairi hai ma yawas (5.1–7.40)

Kirisian sabuw naatu Eteni Sabuw (8.1–11.1)

Ekaleisia ana yawas naatu kwafiren (11.2–14.40)

Keriso morobone misir maiye naatu baitumatumayah

Sabuw Judea ekaleisia hai siwar hiyai hiyafar (16.1-4)

Paul akisin ana not naatu tur yomanin (16.5-24)

1 ¹ Ayu Paul God ana kokomaim eafu atit Keriso Jesu ana Tur abarayan amatar taituwa Sosthenes airi.

² God ana Ekaleisia nati Corinth wanawanamaim kwama'am, iyabowat afa'af kwabai kwatit Keriso Jesu wanawanamaim kusouwi God ana sabuw kakafiyih kwamatar kwama'am, naatu sabuw efan tata'amaim iyabowat it bairit taikofan ata Regah Jesu Keriso wabinamaim tao takwakwafir auman.

³ Manaw kabeber, tufuw, Tamat Godane naatu ata Regah Jesu Keriso'one kwa etei isa nama.

Paul Ana Merarayow

⁴ Ayu mar etei kwa isa God merarayow abitin, anayabin Keriso Jesu wanawanamaim God manaw kabeber bit isan. ⁵ Naatu i wanawanamaim kwa i kwana ef tata'ane totoyuy wairaf kwamatar, a turamaim naatu not rerekabamaim^a sawar etei kwaso'ob. ⁶ Anayabin ayu Keriso isan ao'oreb i kwa wanawanamaim matar ebiturobe. ⁷ Isan imih kwa ata Regah Jesu Keriso na bairerereb isan kwama kwakakaif wanawanan, men kafa'imo ayub ana baigegewasin ta kwasasa'irimih. ⁸ Naatu God boro nabototofari kwanan ana yomanin, saise ata Regah Jesu Keriso nanan ana Veya'amaim kwa boro aur ubar en na'iti. ⁹ God Natun ata Regah Jesu Keriso ana baita'ayomaim bairi run isan ea'afi i kwanitumitum.

Kouseb Ekaleisia Wanawanan

¹⁰ ^d Ata Regah Jesu Keriso ana roubabaruwen fair tafanamaim ayu abifefeyani taitu, abisa isan kwao'o etei kwanibasit, saise kwa wanawanamaim kouseb boro men nama, a not tutufin etei ta'imon namatar kwanama. ¹¹ Taitu, ayu i Chloe tain tuwan afa hina, kwa wanawanamaim kwama kwabigamigam isan hio anowar. ¹² ^e Ayu boro iti na'atube anao, kwa ta'ita'imon a tur ta ta kwao, o ta kuo, "Ayu i Paul abi'ufunun," ta kuo, "Ayu Apollos abi'ufunun," ta kuo, "Ayu Peter abi'ufunun," naatu ta kuo, "Ayu i Keriso abi'ufunun."

¹³ Keriso i kwatarsisib in kau'ay nanabin matar. Iban Paul onaf afe'en kwa isa morob? Ai Paul bai'ufnununamih bapataito kwabai? ¹⁴ ^f Ayu God ana merar ayiy kwa men ta bapataito aitimih, Krisipas naatu Gaius hairi'imo, ¹⁵ imih men yait ta boro inao, ayu i Paul wabinamaim bapataito abai abi'ufunun. ¹⁶ ^g (Boro'obo anot Stephanas aawan ana nibur bairi bapataito aiti, baise anotanot men yait ta bapataito aitinimih.) ¹⁷ Anayabin Keriso i men bapataito isan iyafaru'umih, baise tur gewasin

^a 1.5 so'obamaim ^b 1.8 1Th 3.13; 5.23 ^c 1.9 1Th 5.24; 1Jn 1.3 ^d 1.10 Php 2.2

^e 1.12 Act 18.24-28; 1Cor 3.4 ^f 1.14 Act 18.8; Rom 16.23 ^g 1.16 1Cor 16.15

binan isan iyafaru, naatu men orot babin maiyow hai tur naatu hai notamaim ana'omih, nati na'atube ana'orerereb Keriso onaf afe'en momorob tur gewasin ana fair boro yabin en namatar.

Keriso God Ana Not Rerekab Naatu Ana Fair

¹⁸ ^hAnayabin onaf ana tur sabuw kasikasiyih isah i yabin en, baise iyabowat tayayawas isat i God ana fair ¹⁹ ⁱBuk Atamaninamaim eo na'atube:

“Sabuw notayah hai ukwar rerekab boro anagurus,
naatu sabuw so'obayah, so'ob wairafih hirouw teo'o boro hai not anikwaris.”

²⁰ [/]Bo orot ukwarin rerekabin menamaim ema'am? Orot kirum so'obayan menamaim ema'am? Naatu orot baibasayan ana not gagamin iti tafaram nowan menamaim ema'am? God iti tafaram ana ukwar rerekab botabir na koko'aw mamatar men kwaso'ob?

²¹ ^kAnayabin God ana ukwar rerekabamaim iwa'an sabuw tafaram ana ukwar rerekabamaim hima'am men karam boro hitaso'ob, naatu sabuw iyab iti tafaram ana ukwar rerekab hibaib, iti tur isan yabin en hirouw hio, baise aki onaf isan abibinamaim God iti tur bai sinaf sabuw hitumatum yawas hibai. ²² Jew hikok ina'anan hita'itin hititurobe naatu Greek sabuw i ukwarerekab hinuwih. ²³ [/]Baise it i Keriso onaf afe'en hi'onaf momorob isan tabibinan, iti tur Jew sabuw tenonowar i tainih ekuyikuy, naatu Ufun Sabuw tenonowar isah i yabin en. ²⁴ ^mBaise Jew sabuw naatu Ufun Sabuw wanawanahimaim iyab God eafih hina yawas hibaib, nati sabuw isah Keriso i God ana fair naatu ana ukwar rerekab. ²⁵ ⁿAnayabin God ana ukwar rerekab hi'itin koko'aw hirouw hio'o, i orot ana ukwar rerekab natabir, naatu God ana ririmin hi'itin hio'o, i orot ana fair natabir.

²⁶ ^oTaitu, kwa marasika mi'itube kwama'am ana maramaim God ea'afi i kwananot, sabuw hai itininamaim kwa mounur na'in i men not wairafi, men orot faifir, na'atube atufuwamaim men orot gagamih hai rara'ane kwatufuwamih. ²⁷ Baise God tafaram ana sawar koko'aw hirarouw, rubinen sabuw not wairafih ibiya'uhuwih. Naatu tafaram ana sawar ririmih hirarouw rubinen, sabuw fairih ibiya'uhuwih. ²⁸ Abisa tafaram itin yabin en rarouw i rubin bai, naatu abisa tafaram itin gagamin rarouw i gurus. ²⁹ ^pSaise men yait ta God nanamaim naora'ara'atamih.

³⁰ ^qBaise God buwit tana Keriso Jesu wanawanamaim ikofanit naatu sinaf Keriso ata ukwar rerekab matar. Naatu kakafhine rufamit

^h 1.18 Rom 1.16 ⁱ 1.19 Isa 29.14 ^j 1.20 Job 12.17; Isa 19.12; 33.18; 44.25 ^k 1.21 Mat 11.25 ^l 1.23 Rom 9.32; 1Cor 2.14 ^m 1.24 Col 2.3 ⁿ 1.25 2Cor 13.4 ^o 1.26 Mat 11.25; Jas 2.5 ^p 1.29 Eph 2.9 ^q 1.30 Jer 23.5-6

tatit, yamutufurit God ana sabuw kakafiyih tamatar. ³¹Isan imih Buk Atamaninamaim eo na'atube, "Yait nakokok ora'ara'atamih Regah abisa sisinaf tafanamaim nao ra'ara'at."

Keriso Hio'onaf Ana Tur

2 ¹Taitu, ayu ana kwa abinanawani ana vey'a'maim, men au manam abotait, tur fokarih imaim ao, God ana kirikirifot tur anababatun a binan kwanowaramih. ²En baise, ayu abinanawani ana vey'a'maim, au so'ob etei au'uf ayai, Jesu Keriso akisinamo onaf afe'en momorob i nuhu'umaim ma a binan kwanowar. ³Kwa biyamaim atitit i aririm naatu au bir ra'at, au umau hi'oror auman ana. ⁴Naatu ayu au tur au binan i men orot not wairafih hai tur teo ibitenmumuni na'atube ao ai obaiyimih, baise abisa abi'obaiyi i turobe kwa'itin, God Anunin ana fairamaim. ⁵Saise kwa a baitumatum men orot hai so'ob tafanamaim kwanabatamih, baise God ana fair tafanamaim kwanabat.

Anun Kakafiyin Ana Ukwar Rerekab

⁶Baise iti ukwar rerekab ana tur i sabuw iyab hai baitumatum hikwatukwat wanawanahimaim ao'orerereb. Baise men iti tafaram ana ukwar rerekab, o iti tafaram kaifenayah hai ukwarerekabamih,^u anayabin iti tafaram ana ukwar rerekab i boro nasawar. ⁷En baise, it i God ana ukwar rerekabamaim tur wa'iwa'irin tao'orerereb, iti ukwar rerekab tur tafaram matara'e ana vey God yakitifuw ibun it ata gewasin isan.^v ⁸Tafaram ana kaifenayah, iti ukwar rerekab i men yait ta so'ob, hitasoso'ob na'at, boro men Regah yawas matuwan onaf afe'en hita'onaf tamorobomih. ⁹Baise Buk Atamaninamaim hikirum hio na'atube, "Abisa God sisinaf men yait ta itin o nowar men yait ta notanot boro iti na'atube tamatar, iti sawar i God yabuna sabuw iyab i tibiabuw isah."

¹⁰Baise God Ayubinamaim iti sawar baina irerereb. Anayabin God taiyuwin Ayubin sawar etei so'ob; naatu God ana kirikirifot auman etei so'ob. ¹¹O akisimo abisa kunotanot boro karam inaso'ob, ef ta'imon nati na'atube God Ayubin akisinamo God ana not so'ob. ¹²It men iti tafaram ayubin tabaimih, baise God Anunin Kakafiyin biyafar i tabai, imih God ana baigegewasin abisa iyafar tabaib i boro karam tana'inan tanaso'ob.

¹³Tur abisa ao i men orot ana ukwarerekabamaim ao, baise God Anunin Kakafiyin bi'obaiyi'imaim ao, saise ayubitane ana tur anao gewas sabuw ayubihine tema'am boro hinaso'ob. ¹⁴Orot yait Anunin Kakafiyin

^r 1.31 Jer 9.24 ^s 2.3 Act 18.9; 2Cor 10.1 ^t 2.4 1Th 1.5 ^u 2.6 so'ob ukwarerekab iti boun kwabai kwama'am ^v 2.7 saise i wanawananamaim tanama tanao ra'ara'at isan
^w 2.9 Isa 64.4

biyanamaim men ema'am God Anunin Kakafiyin biyanane usar tenan boro men nabow. Nati sawar i'tin i yabin en, naatu hai yabin auman men naso'ob. Anayabin iti sawar etei hai an i ayubine boro nafufun nayamutufur gewas. ¹⁵Orot yait Anuninane ebobonawiy karam sawar etei boro nafufunen gewas, baise orot ta ana bowabow isan boro men nafufun. ¹⁶xBuk Atamaninamaim eo na'atube

“Yait i Regah ana not so'ob?

Yait i karam boro Regah ana binan nao?”

Baise it i Keriso ana not tabai.

Kouseb Ekaleisia Wanawanamaim

3 ¹Taitu ayu men karam boro sabuw iyab God Anunin hibai hima'am au'uwich na'atube kwa au'uwmih. Baise tafaram ana naniyanamaim au'uwi, anayabin kwa a baitumatum Keriso wanawanamaim men ra'at. Kwa a'tinin i kek sosof na'atube. ²yImih kwa i boro kek sosof na'atube anitomani, men bay mafur anit, anayabin kwa bay aanin isan wa'ar men hiyen, tur anababatun wa'ar men hikufot nati bay isan. ³zKwa ama ana itinin i boro'ika tafaram ana yawasamaim kwama'am, anayabin kwa boro'ika kwama kwabibobowen, taiyuw nena kwabigamigam, imih nati ebi'obaiyit, kwa i tafaram nowan naatu tafaram ana naniyanamaim kwama'am. ⁴aImih orot ta kuo, “Ayu i Paul abi'ufunun,” orot ta kuo, “Ayu i Apollos abi'ufunun.” Nati na'atube kwabiwa'an ana itinin kwa i tafaram ana sabuw tisisinafube kwama kwasisinaf. ⁵bMen kwananot Apollos i orot na'in, naatu men kwananot Paul i orot na'in, En. Aki i God ana akir wairafi, imih kwa aibaisi kwana God kwabitumitum, nati i aki ta'ita'imon ai bowabow God biti'imaim abowabow. ⁶Ayu ub^c atanum, Apollos ufu na tapan harew rir. Baise God akisinamo iwa'an ub kuboun yen ra'at. ⁷Orot yait ub tatanum naatu orot yait harew ririr i men abisa hiwa'an matar. Baise God akisinamo ub kaif yen ra'at ⁸dOrot yait ub tatanum naatu orot yait harew ririr hairi hai not i ta'imon hinot hisinaf. Imih God boro ta'ita'imon hai bowabowamaim hibowabow isan nibaiyanih. ⁹Anayabin it etei i tai'ofbonen God isan tabowabow, imih kwa dogor i God ana me^e naatu ana bar.

¹⁰Manaw kabeber Godane abai, bar ana wabat arouw, wowab so'obayah tewowowab na'atube. Naatu orot afa iti bar ana wabat tapanamaim hibat tewowowab. Baise orot ta'ita'imon matah toniwa'an bar hinanutitiy gewas hinawowab. ¹¹fAnayabin God i bar ana wabat ta'imon maiyow Jesu Keriso akisin bai ata wabatamih rouwika. ¹²Imih orot ta ta boro gold,

x **2.16** Isa 40.13 y **3.2** Heb 5.12-13; 1Pet 2.2 z **3.3** 1Cor 1.10-11 a **3.4** 1Cor 1.12

b **3.5-6** Act 18.4, 11, 27-28 c **3.6** kwa dogoromaim d **3.8-9** Mat 16.27; Eph 2.20-22

e **3.9** ana masaw f **3.11** Isa 28.16; 1Pet 2.4-6

silver, agim biyah rurumih, ai maiyow, raiyarayar o geyagey rourihimaim boro iti wabat tafan hinawowab nayen. ^{13g}Naatu orot ta ta hai bowabow etei boro nibebeyan, anayabin nati ana vey'a'maim marakaw boro nakusislar nare, naatu wairaf nato'ab ata bowabow nafufun etei hina'arat hinadew hinare. Imaibo bowabow yabin anababatun boro nirerereb.

¹⁴Naatu bar nati wabat anababatun tafanamaim arahina'e ebatabat wowabayan boro ana baiyan nab. ¹⁵Baise orot yait ana bar wairaf ea'arah ana sawar etei boro na'arah ni'en, naatu orot boro nayawas, nayawas ana itinin i wairaf wanane bihir titit na'atube.

¹⁶^hKwanaso'ob kwa biya i anababatun God ana kwafiren bar, naatu God Anunin Kakafiyin i kwa wanawanamaim ema'am. ¹⁷Orot yait God ana bar egugurus, God boro ibo nagurus, anayabin God ana bar i kakafiyin naatu kwa biya i nati bar.

¹⁸Men taiyuw kwanifufuwimih. Orot ta kwa wanawanamaim nanot nao ayu i not wairafu iti tafaram wanawanamaim. Kwaihamiy taiyuwin ifuwifuw, saise i ana baifufuwenamaim boro ana not narerekab.

¹⁹ⁱAnayabin tafaram ana ukwar rerekab God matanamaim i yabin en. Buk Atamaninamaim hikirum hio na'atube. "Sabuw not wairafih hai so'obamaim taiyuwih hai warasa hiyai buwih tere'ere." ²⁰Naatu Buk Atamaninamaim iban eo maiye, "Regah sabuw etei hai not naatu hai so'ob wanawanan nutitiy i'itin i nikuwat." ²¹Isan imih sabuw abisa tisisinaf isan men kwana bora'ara'ahihimih, anayabin sawar etei kwa nowa. ²²Paul, Apollos, Peter, me tafaram, yawas, o morob, mar iti boun enan, o mar boro nanan, iti sawar tutufin etei i kwa nowa. ²³Kwa i Keriso nowan naatu Keriso i God nowan.

Keriso Ana Tur Abarayah

4 ¹Naatu boun it i Keriso ana akir wairafih na'atube sabuw hina'itit, naatu God ana buriburih koubuna'ayah na'atube hina'itit.

²^kNaatu sabuw iyab hitutumih iti bowabow hibitih hai orot ukwarih isah hinabosunusunub. ³Ayu au yawas kwanafufun o sabuw au yawas hinafufufun isan men abiyababan. Anababatun a tur ao'owen taiyuwu au yawas men afufufun. ⁴Ayu taiyuw au not iu'uwu men kakafin ta asinaf, baise boro men nati'imaim anab au kakafin en ana'omih. Regah akisin boro ayu nibatiyu. ⁵^lIsan imih orot babin baibatiyin isan vey'a hiyai'iyai boro enan, kwanakaif Regah nan natitabo. I nanan ana vey'a gugumin wanawanan abisa wa'iwa'irin inu'in marakaw boro nakusislar narun naatu orot dogoroh ana wa'iwa'irin etei boro nabow hinatit hinirerereb. Imaibo orot ta'ita'imon abisa hisisinaf isan God boro nabora'ara'ahih.

^g 3.13 1Cor 4.5 ^h 3.16 1Cor 6.19; 2Cor 6.16 ⁱ 3.19 Job 3.13; 5.13 ^j 3.20 Psa 94.11

^k 4.2 Luk 12.42 ^l 4.5 1Cor 3.8

^{6m}Taitu, boun ayu akokok Apollos airi biyai'imaim bai'obaiyen ta anayai kwata'itin, saise tur abisa hio hikikirum yabin kwanaso'ob. "Tur abisa hikikirum ana fofoninamaim kwanao, men kwanatetebon." Orot ta kwanabora'ah naatu ta kwananuw furuw kwanau kwaniyimih. ⁷ⁿYait eo kwanowar kwa i turanah etei tafahimaim? Sawar etei kwabow kwama'ama etei i God it. Aisim taiyuw kwabobora'ara'ahi, ana itinin iti usar i kwabai kwaniyibe?

⁸Kwa a kok sawar etei i kwabow karam kwama'am. Naatu boun kwa i totobuyoy wairaf kwamatar, kwana kwai'aiwoboka, aki baise en. Au notamaim akokok mi'itube kwati'aiwob gewas, saise aki auman bairit tati'aiwob youn. ⁹Ayu akisu au itinin, aki tur abarayah ai efan i urantoro'ot anababatun God yai, ana itinin dibur sabuw bebeyan ma'o'ow ana efanamaim terouw temomrob na'atube. Aki boro bebeyanamaim ana morob tounamatar naatu sabuw tutufin etei hinamau'ui. ¹⁰Keriso wabinamaim taiyuwi ai'itinin na koko'awabe amatar, baise kwa i Keriso wanawanamaim kwana not wairafi kwamatar. Aki i ariririm, baise kwa a fair i erara'at, aki tinunuw furuwi, baise kwa i tekakakafiyi. ^{11o}Iti boun ana veyama'aim aki sikai harewamih mamah, abi'aamorob, ai ar ai faifuw tibiririk, segar hiborabirabi efamaim a'in ama areremor ai bar en. ^{12p}Bowabow gagamin maiyow abowabow isan ahahahar, sabuw teo rarafi ana veyama'aim aki baigegewasin abitih, terabi tibia'akiri ana veyai ewawainabi. ¹³Tiu'ui kwanikwaniyi ana veyai, yabow turamaim abiyafutih. Boun ana veyama'aim aki i tafaram ana hain naatu bay ana merakas na'atube amatar.^q

¹⁴Ayu iti fef i men kwa itinin biya'ohow isan akikirumamih. Baise akokok animatnuwi, anayabin kwa i ayu natunatu au yabow. ^{15r}Basit kwa ayub ana bonawiyenayah etei 10,000 na'atube tibi'obaiyi, baise tamatanah i men moumurih, anayabin Keriso Jesu ana baikofanamaim ayu ana kwa tamat amatar tur gewasin abai ana ait. ^{16s}Imih abifefeyani, ayu abisa asisinaf na'atube kwani'u'uru. ^{17t}Ana'an iti isan ayu natu au yabow kek wabin Timothy kwa isa abiyafar. Iti kek i Regah ana bowabow isan ebobosunusunub, i enan boro kwa nuhinakusib, ayu au yawas naatu au bowabow mi'itube Keriso ana yawasamaim ama abowabow boro nao kwananowar, naatu mi'itube ekaleisia sabuw efan ta ta abi'obaiyih auman boro nao kwananowar.

¹⁸Kwa afa kwanotanot ayu boro men atan atinanawani kwarouw, imih kwa abai'oro'orot erara'at. ¹⁹Baise ayu boro'omo anan aninanawani, Regah nakokok na'at. Imaibo boro taiyuwu anaso'ob, naatu men bai'o'orotoyah hai tur akisin, baise hai fair menane hibaib auman

^m 4.6 Rom 12.3 ⁿ 4.7 Rom 12.6 ^o 4.11 2Cor 11.23-27 ^p 4.12 Mat 5.44; 2Th 3.8

^q 4.13 hikwahiri ^r 4.15 Gal 4.19 ^s 4.16 Php 3.17 ^t 4.17 Act 19.22

anaso'ob. ²⁰ "Anayabin God ana aiwob i men turawat namomon, baise ana fair auman. ²¹ Kwa a kok i boro abisa anab anan kwana'itin? Wabir anab anan ana wabir? O taiyuwu ana yara'iyu yabowamaim anan kwa isa?

Yait Ebiwa'an Kwanekwan Kwanabotait

5 ¹ Tur anonowar kwa wanawanamaim intabitabir baiwa'an kwanekwan i ra'at, Eteni Sabuw iyab God men hisusu'ub bowabow iti na'atube i men tisisinaf. Iti ao anayabin, ayu tur anowar orot ta kwa wanawanamaim i tamah aawan ufuyey hairi ti'inu'in. ² Naatu kwa aisim kwabi'o'orot? Ana gewasin kwat iyababan kwatarerey, orot nati bowabow kakafin sisinaf a kou'ayomaim kwatabotait. ³ "Ayu biyau'umaim i ef yok ama'am, baise ayubu'umaim i nati bairi tama'am. Naatu Jesu wabinamaim orot yait nati sisinaf baibatien abitin, nati'imaim atama atao efanin iti'imaim ao. ⁴ Ata Regah Jesu Keriso wabinamaim a kou'ay kwabaib, ayu ayubu'umaim i nati wanawanamaim, naatu Regah ana fair ere etatargubi ana vey ⁵ nati orot bowabow kakafin sisinaf i Satan kwanitin biyan ana kakafin nagurus, saise ata Regah nanan ana veyamaim ayubin boro yawas nitin.

⁶ "Kwa taiyuw kwabobora'ara'ahi ana itinin men gewasin, tur hio i kwaso'ob. "Yeast kikimin maiyow, baise faraw wanawanan hinayai hinakakamat boro nara'at nagadid." ⁷ "Yeast atamanin i kwaisaroun, saise kwa boro faraw boubun wanawanan ana yeast en kwanamatar, boun kwama'am na'atube kwanama. Anayabin Keriso Tar Nowaten ana sheep natun i sibor yai'ika. ⁸ "Isan imih Tar Nowaten ana hiyuw isan tanaben taniyasisir, men yeast atamaninamaim, anayabin yeast atamanin wanawanan i baiyow ana koukra'at naatu tafa'asar ema'am, baise faraw wanawanan yeast en, nati faraw i uhew naatu mamarin.

⁹ Ayu au fef kwa isa akikirum i ao kwanowar, sabuw baiwa'an kwanekwaneyah men bairi kwanita'imon. ¹⁰ Iti ao i men sabuw iyab baitumatum atih hima tibiwa'an kwanekwan, tibikabat, tebabain, naatu umataratar tekwakwafirih haiwih isan ao'omih. Baise sabuw nati na'atube haiwih isan kwa boro tafaram ana yawas tutufin etei kwanakwahir. ¹¹ "Baise ayu ao i kwa taiyuw a sabuw baitumatumayah, iyab tibiwa'an kwanekwan, tibikabat, sawar umataratar tekwakwafirih, taituwah terararafih, tetomatom kwanekwan, tibifufuwen, i bairi men kwanaa kwanatom isan ao.

¹² Ayu men au ef ema'am boro ekaleisia sabuw tafaror ufunane tema'am ana fufunih, baise ana gewasin kwa i boro a kou'ayomaim taituwa akisihimo kwanibatiyih kwanayamutufurih. ¹³ "God akisinamo sabuw

" 4.20 1Cor 2.4 ^v 5.1 Lev 18.7-8; Deu 22.30 ^w 5.3 Col 2.5 ^x 5.5 1Tim 1.20 ^y 5.6 Gal 5.9 ^z 5.7 Isa 53.7; 1Pet 1.19 ^a 5.8 Deu 16.3 ^b 5.11 2Th 3.6; Tit 3.10 ^c 5.13 Deu 13.5; 17.7; 19.19; 22.21; 24.7

iyab kou'ay ufunane tema'am boro nibatiyih. Buk Atamaninamaim eo na'atube, "Sabuw tafa'asarih a kou'ayomaim kwanunih titit."

Baitumatumayah Hai Yamutufuren Tur

6 ¹Kwa taiyuw wanawanamaim o tura ta airi kwabi'osukwaraben, aisim kwabai kwan sabuw iyab God men hisusu'ub teyayabunei?^d Ana gewasin i boro kwatab kwatan sabuw iyab God hisusu'ub hitayabunei. ²eGod ana sabuw tafaram ana kakafin yabuna'in isan hibi'obaiyi nuhibur? Naatu iti tafaram yabuna'in isan ana ef hibi'obaiyi i kwaso'ob ai en? Kwa i karam yababan gidigidih naatu gagamih boro kwanayabuna. ³Naatu tounamatar boro tanabibatiyih isan hibi'obaiyi nuhibur? Sinaf gagamih nati tanasisinaf, it karam yababan etei boro tanayabuna. ⁴Isan imih bai'osukwaraben iti na'atube hinamamatar, wanawanamaim orot afa yabuna ana ef kaifai hisoso'ob kwanarubinih hinayabuna. ⁵Biya tehow! Kwa wanawanamaim orot not wairafih i tema'am, karam baitumatumayah wanawanamaim kwabi'osukwaraben boro hinayabuna. ⁶Baise aisim taituwa ibai sabuw iyab God men hisusu'ub baibatinyinamih kubitih.

⁷Sinaf nati na'atube kwa wanawanamaim kwasisinaf bebeyan ebi'obaiyi kwa a ef etei i kwaso'ir. Sabuw afa kwa isa hitasinaf kakaf naatu hitifufuwi i boro ana itinin tigewasin? ⁸Baise nati efanin kwa taiyuw kwabifufuwi naatu kwasinaf kakakaf taituw kwabuwih ubar kwabitih itinin kakafin.

⁹Sabuw tafa'asarih^g God ana aiwob nowahamih boro men hinabaib i kwa kwaso'ob. Men taiyuw kwanifufuwi, kwaniwa'an kwanekwan, turanah a'awah ufuh kwanan, sawar inu'inuwi men kwanakwafirih, orot taiyuw turanah bairi men kwaniwa'an kwanekwan, baibin taiyuw auman men kwaniwa'an kwanekwan, ¹⁰men kwanabain, men kwanikabat, men kwanatom kwanekwan, men taituwa kwanararafih, men taituwa kwanifufuwih hai sawar kwanabow. Sabuw yawas iti'imaim tema'am God ana aiwob boro men ninowahimih. ¹¹^hKwa afa i marasika na'atube kwama kwasisinaf. Baise boun kwa i ata Regah Jesu Keriso wabinamaim naatu God Anun Kakafiyin ana fairamaim a kakafihine kusouwi, kubaituturi naatu yamutufuri God nowan kwamatar.

Biya I God Ana Bar

¹²ⁱO ta inao Sawar etei i gewasih sinaf isan hibasit. Baise a tur ao'owen sawar etei inasisinaf^f boro men ta gewasin nitimih. Orot ta boro inao, sawar ta ta i ayu au kokomaim sinafumih hibasit. Baise ayu men akokok

^d 6.1 tibatiyih ^e 6.2 Rev 20.4 ^f 6.9-10 Gal 5.19-21; Eph 5.5; Rev 22.15 ^g 6.9 was geyayah ^h 6.11 Tit 3.3-7 ⁱ 6.12 1Cor 10.23 ^j 6.12 inabowabow

boro nati sawar ta ta nabonawiyu ana akir wairafin anamataramih.
¹³kO ta boro inao, “Biyat i kabutit isan naatu kabutit i biyat isan.”
 Baise bay naatu kabutit hairi God boro nagurus, imih biyat i men
 kakafinamaim tanayai taniwa’an kwanekwanemih. Baise Regah isan
 tanabow, anayabin biyat mar etei Regah ebituw. ¹⁴God ata Regah Jesu
 morobone iyawas misir, imih it auman boro i ana fairamaim niyawasit
 tanamisir maiye. ¹⁵mKwaso’ob kwa biya i Keriso biyan turin, imih men
 karam Keriso biyan turin tanab baiwa’an kwanekwaneyan biyanamaim
 tanikofanimih, men karam. ¹⁶nKwaso’ob orot yait biyan bai na babin
 baiwa’an kwanekwaneyan biyanamaim ebikofan i na nati babin biyan
 turin matar. Anayabin Buk Atamaninamaim bebeyan eo, “Sabuw rou’ab
 boro hinan biyah ta’imon matar.” ¹⁷oBaise orot yait Regah biyanamaim
 ebikofan i na Regah wanawanan run biyan turin matar. ¹⁸Imih baiwa’an
 kwanekwan i kwanahaiw, bowabow kakafih afa orot isisinaf i biyan
 ufunane esisinaf, baise orot yait ebiwa’an kwanekwan i taiyuwin biyan
 bokarit gubamin matar. ¹⁹Kwa biya i Anun Kakafiyin ana bar,^p God
 ana usar kwa it wanawanamaim ema’am, imih kwanaso’ob biya i men
 kwa akis nowa, baise God nowan. ²⁰qAnayabin kwa biya i sawar ta ana
 baiyan gagaminamaim tubun. Imih biya i ana efamaim kwanasinaf God
 kwanitin ana marakaw isan kwanabow.

Tabin Ana Baibat

7 ¹Boun i kwa fefemaim abisa isan kwakikirum i anao kwananowar.
 Orot yait tabina’e asir ema’am i gewasin maiyow. ²Baise anayabin
 baiwa’an kwanekwan ana naniyan i ra’at, imih orot babin iyab tabina’e
 tema’am mi’itube hitatabin, saise i a’awah bairi’ika hitama. ³Naatu orot
 ana kok abisa aawan biyanamaim tasinaf tiyasisir na’atube babin ana kok
 abisa aawan biyanamaim tiyasisir. ⁴Babin biyan men i akisin nowanamih,
 baise orot nowan, na’atube orot biyan men i akisin nowanamih, baise
 babin nowan, na’atube orot biyan men akisin nakaif, baise babin nakaif,
 naatu babin biyan men akisin nakaif baise orot nakaif. ⁵Imih orot aawan
 hairi inumih nakokok babin men nakwahir, na’atube babin aawan hairi
 iumih nakokok orot men nakwahir, baise vey afa hairi hinibasit mar
 kafai asir hinama, saise nati vey i yoyoban hinitin. Imaibo vey ta
 naniyah nakokok na’at aawan hairi hina’in saise biyah ana naniyan na’in
 bainub, asir boro Satan imaim nan narun routobon nitih. ⁶Iti i ayu au not
 kwa au’uwi, baise men nati na’atube sinaf isan abiyunimih. ⁷Ayu au kok
 kwa etei mi’itube ayu’ube kwatama, baise orot ta’ita’imon ata usar etei

^k **6.13** 1Th 4.3-5 ^l **6.14** Rom 8.11; 1Cor 15.20; 2Cor 4.14 ^m **6.15** Eph 5.30 ⁿ **6.16** Mat
 19.5-6; Gen 2.24 ^o **6.17** Jn 17.21-23; Rom 8.9-11 ^p **6.19** kwafiren bar ^q **6.20** 1Cor 7.23;
 1Pet 1.18-19

God faramit, orot ta i ana usar ta God itin, na'atube orot ta ibo ana usar ta God itin.

⁸Baise kwa tabin ati'at, naatu kwafukwafuriy, katukatuwiy, kwa auman au'uwi, gewasin tabin en asir kwatama, ayu ama'ama'abe. ⁹Baise a naniyan nakukura'ara'ah na'at, gewasin kwanatabin, anayabin tabin i gewasin, men basit baiwa'an isan itanot dogor wairafabe ta'arah mar etei.

¹⁰Kwa toutabin sabuw obaiyunen tur iti abit, men ayu, baise Regah ana obaiyunen tur, babin men aaw orot inihamiy. ¹¹Baise babin yait aawan orot nabihamiy na'at, gewasin nati babin men natabin asire nama, naatu nakokok na'at namatabir maiye aawan hairi hitounuw hinama. Naatu orot men aaw inakwahir.

¹²Baise kwa afa isa ayu akisu au not iti, men Regah ana not. Orot yait babin men baitumatumayan ebi'awan naatu babin ana kok i orot hairi ma'amih, orot men babin nakwahir. ¹³Naatu babin yait orot men baitumatumayan ebi'awan orot ana kok i babin hairi ma'amih, babin men orot nakwahir. ¹⁴Anayabin orot ana baitumatumamaim babin kusouw na kakafiyin matar, na'atube orot ana baitumatumamaim babin kusouw na kakafiyin matar, asire natunatuh boro gubagub auman hitama, baise boun natunatuh i hina kakafiyin himatar.

¹⁵Baise orot baitumatum atin ekokok aawan kwahirinamih, kwaihamiy ekwahir, anayabin hairi hai tabin men hifatum. God ana kok it i tufuwamaim tanama. ¹⁶O babin aaw baibaisin na baitumatumayan matar isan ana ef boro mi'itube inaso'ob gewas? Naatu o orot, aaw baibaisin na baitumatumayan matar isan ana ef boro mi'itube inaso'ob gewas?

God Ea'afi Na'atube Kwanama

¹⁷Ef ta'imon i iti, orot babin ta'ita'imon ana yawas abisa Regah bitin na'atube imaim nama. Yawas wantoro'ot mi'itube tama'ama God ea'afit na'atube tanama. Iti i ayu au obaiyunen tur ekaleisia wanawanan areremor i abi'obaiyih. ¹⁸O yait a'ar mo'on hi'afuw ima'am ana vey God ea'afi, men a fit inibunwa'ir, naatu orot yait ana ar mo'on afuwina'e ma'am ana vey God eafi'af, men ana ar mo'on afuwinamih nanot. ¹⁹Anayabin orot ana ar mo'on afu'afuw, o afuwina'e nati i yabin en, baise ana'an gagamin i God ana obaiyunen tur tanabosiyasiyar. ²⁰Orot etei mi'itube kwama'am ana vey God ea'afi i na'atube kwanama. ²¹O yait bai'akir ana yawasamaim ima'am ana vey God ea'afi, men nati isan iniyababan, baise a vey kebor inabaib na'at nati bai'akir ana fafatumane kurufami kutit. ²²Anayabin orot yait akir ana bowabowamaim ma'am Regah eaf

^r 7.9 1Tim 5.14 ^s 7.10 Mat 5.32 ^t 7.15 Rom 14.19 ^u 7.16 1Pet 3.1 ^v 7.19 Rom 2.25; Gal 5.6; 6.15 ^w 7.22 Phm 16; 1Pet 2.16

titit, i Regah ana rufamen orot, na'atube orot yait roufamenamaim ma'am Keriso eaf titit, nati orot i Keriso ana akir wairafin. ²³Kwa i sawar ta baiyan gagaminamaim God tubuni kwatit, imih men kwanan orot ta isan kwani'akiramih. ²⁴Taitu, kwa ta'ita'imon ama mi'tube kwama'am God e'afi kwana baitumatumayah kwamamatar na'atube kwanama.

²⁵Naatu kwa baibitar biya numih, kwa isa ayu men Regah biyanane tur ta abaimih, baise Regah ana kabeberamaim ayu not iti bitu ana'o i kwanitumatum. ²⁶Mar iti boun yawas i fokar, imih ayu anotanot ana gewasin kwa mi'tube kwama'am i na'atube kwanama. ²⁷O toutabin na'at men babin kwahirinamih ana ef inanuwet, naatu o tabina'e kuma'am men tabinamih babin inanuwet. ²⁸Baise inatatabin na'at nati i men bowabow kakafin kuisinaf, naatu babitai tatabin auman i men bowabow kakafin esisinaf, baise kwa iyab kwatatabin yababan boro moumurih maiyow kouh kwanayen, imih tarafafari isan tur iti ao.

²⁹Taitu, abisa ao yabin i iti, mar i na kabom, imih boun it ata veyama'im orot iyab toutabin tema'am hinimonok Regah isan hinabow. ³⁰Sabuw iyab terererey, hai itinin men yababanabe hinama'amih, sabuw iyab tibiysisir hai itinin men yasisirabe hinama'amih. Naatu sabuw iyab guguw wairafih hai itinin i guguw enabe hinama.^x ³¹W Kwa iyab iti tafaram ana sawar moumurih na'in kwabowabow men sawar anot awan nakaratan, anayabin iti tafaram naatu sawar etei boro nan nasawar.

³²Ayu akokok kwa etei yababan fatumi kwama'am kwanarufami kwanatit. Orot tabina'e ema'am ana not etei Regah ana bowabow isan ebitin, ekokok nabow Regah niyasisir. ³³Baise toutabin orot i tafaram ana bowabow isan enotanot kwanekwan, anayabin i ekokok nabow aawan niyasisir. ³⁴Imih i ana not kusib ef rou'ab himatar, ef ta'imon nati na'atube, babin tabina'e ema'am o babitai biyan numin, ana not tutufin etei i Regah ana bowabow akisin isan enotanot. Baise toutabin babin i tafaram ana bowabow isan enotanot kwanekwan, anayabin i ekokok nabow aawan orot niyasisir. ³⁵Ayu iti ao anayabin akokok kwa anibais, i men ao'ofafari, baise akokok ef gewasin kwasinaf a yabow Regah isan i wan kwanayai kwanabow.

³⁶Monok babitai hairi hai rum hio, naatu monok naniyan i ekukura'ara'ah babitai isan naatu kwamur auman i erara'at ekokok natabin, karam hinatabin men bowabow kakafin. ³⁷Baise orot yait i taiyuwin ana notamaim tabin men ekokok men yait na'okikin, i karam taiyuwin ana naniyan imurub ema'am karam tabina'e nama, iti orot i ef gewasin esisinaf. ³⁸Imih orot yait etatabin i gewasin, baise orot yait tabina'e ema'am i gewasin anababatun.

^x **7.30** yasisir wairafi, yababan wairafi naatu guguw wairafin kwananowar men iti sawar narowentani God ana bowabow kwanihamiyimih. ^y **7.31** 1Jn 2.17

³⁹“Orot yawasin ema’am ana veyababin i aawan biyanamaim hifatum ema’am, baise orot emomorob ana veyababin i orot biyanamaim hirufam tit, orot ta i ana kokomaim boro ni’awan, baise nati orot i Regah ana kou’ayomaim ema’am ni’awan. ⁴⁰Baise anotanot tabina’e tama’am na’at i boro tiyasisir gagamin maiyow. Ayu anotanot ayu auman God Anunin targabuwu ama’am.

Sawar Murubih Isah Bay Tisisibor Ana Baibat

8 ¹aBoun i akokok bay sawar murubih isah kwasisibor isan kwakirum nan i anao kwananowar. Tur anababatun it etei’imak iti sawar isah i taso’ob. Naatu iti so’obamaim it wowabit tayen tabi’orot. Baise yabow i wowabit gewas orot babin tabibais. ²bOrot yait sawar etei so’ob rouw eo, men kafa’imo abisa ta so’obamih. ³Baise orot yait God ebiyabow God nati orot i su’ub naatu ekakaif.

⁴cSabuw afa bay wagabur isah hisisibor hibow te’aa isah anao kwananowar, wagabur i men God, naatu God i ta’imon maiyow, tafaram wanawanan men god ta sisibinamaim ema’am. ⁵Turobe sabuw afa boro hinao, mar wanawanan naatu tafaram wanawanan wagabur i awan karatan. Turobe wagabur, yoyom i moumurih na’in. ⁶dBaise it ata God i ta’imon, Tamat i akisin biyanane sawar etei himatar naatu i wanawananamaim it tama’am, naatu ata Regah Jesu Keriso i ta’imon, i akisin wanawananamaim God sawar etei eo himatar naatu i akisin wanawanan it tama’am.

⁷Baise sabuw moumurih na’in iti men hiso’obamih. Sabuw iti na’atube marasika hima hisisinaf au naniyah in, imih bay hibow te’aa i tenotanot wagabur isah hisisibor hibow te’aa terarouw, naatu hai notamaim iu’uwih biyah gubagub matar, anayabin kakafin gewasin kusibin ana not i ririmin. ⁸Baise bayumaim boro men nabuwit tanan God sisibin tanatitamih, bay tana’ani’aan na’at God boro men natawanamih, naatu men tana’ani’aan God boro men it gewasit narouw na’omih.

⁹eBaise kwanakaifi gewas, kwa hirufami kwatit yawas kwabaib men imaim kwanasinaf taituwa iyab hai baitumatum ririmin tema’am kwanikwarisihimih. ¹⁰Anayabin o iso’ob abisa kuisinaf, imih o boro wagabur hai kwafiren bar wanawanan sibor inabow inaa. Baise orot ta ana not ririmin o na’i’iti boro fair na’atube nab naatu gem tafanamaim wagabur isah hisisibor boro nabow na. ¹¹Naatu taituwa ana not ririmin ma’ama o aso’obamaim ana not i’asabun, inaso’ob nati taituwa isan Keriso morob. ¹²Imih o taituwa isah bowabow kakafin iti na’atube isinaf hai not ririm feher kubitih, nati i o Keriso isan bowabow kakafin

^z 7.39 Rom 7.2-3 ^a 8.1 Act 15.29 ^b 8.2 Gal 6.3 ^c 8.4 Deu 4.39; 6.4; Gal 4.8 ^d 8.6 Eph 4.5, 6 ^e 8.9 Rom 14.13-15; Gal 5.13 ^f 8.11 Rom 14.15, 20

kusisinaf. ¹³Isan imih ayu abisa ani'aanimaim aiwa'an taituwau bowabow kakafin wanawanan re'er ayu nati for men ana'aan maiye, saise men ana sinaf maiye nare.

Tur Abarayah Hai Bowabow Anababatun

9 ¹^hKwanotanot ayu i fatufatum wanawanan ama'am? Naatu kwanotanot ayu i men Regah ana tur abarayan? Naatu ata Regah Jesu Keriso men aitin? Naatu kwanotanot kwa i men ayu au abowabow ana ro'on? ²ⁱSabuw afa ayu men tur abarayan na'atube hinabubuwu na'at, baise kwa boro ayu kwanabuwu, anayabin kwa ayawas Regah wanawanamaim ebi'obaiyi, turobe kwa i ayu au bowabow ana ro'on, imih ayu i Regah ana tur abarayan.

³Sabuw ayu tegam tiu'uwu ana maramaim ayu iti na'atube ao awawasfamaru. ⁴^jAki a bowabow isan ai ef ema'am boro anaa, anatom ai en? ⁵^kAi ef ema'am karam boro toutabin babin baitumatumayah bairi anaremor, tur abarayah, afa ata Regah Jesu taitin naatu Cephas tisisinaf na'atube ai en? ⁶^lAi ayu Barnabas airi'imo, ai aa ai tom isan anama anabow?

⁷Baiyowayan orot ebowabow men i taiyuwin ana baiyan ebitin. Naatu orot yait masaw bowayan ana masawamaim *grape* ro'oro'on boro nirut, naatu bobaituw kaifenayah ana *cow* hai nun boro natom. ⁸^mAyu men orot ana roubabaruwen fairamaim ao'omih, anayabin God ana obaiyunen tur i ta'imon nati na'atube eo ema'am. ⁹ⁿMoses ana ofafaramaim kikirum iti na'atube eo "Bobaituw wabin *ox*^m sanabey nawawas kweyakweyaren ana vey men awan kwana'utan." God iti na'atube eo'o kwanotanot i *ox* isan eo? ¹⁰^oEn baise, iti tur eo i anababatun it isat eo, turobe iti tur hikikirum it tananowar isan, anayabin orot yait me ebifufubiy naatu orot yait ai ro'on rab ekibikib, hairi nuhih fot hima tebowabow anayabin hairi boro nowah nowah hinafaramih hinabow. ¹¹^pAyubit ana ub gewasin kwa wanawanamaim atatanum isan, kwa biyane sawar baibaisi isan ana bife Feyani, kwanotanot i ra'at kwanekwan? ¹²^qOrot afa tebowabow baibais kwabitih na'atube, aki auman karam boro baibais kwaniti.

Baise aki nati fair men karam tafan atabat atao kikini, nati efanin aki sawar etei wanawanahimaim wainabi abow saise tur gewasin Keriso isan abibinan men ana ef atahir. ¹³^rKwaso'ob orot iyab Tafaror Bar gagamin wanawanan tebowabow hai bay i Tafaror Bar ana siwarane tebaib, naatu orot iyab gem kakafiyinamaim sibor te'aa auman i gem kakafiyin tafanamaim sibor turin tebaib. ¹⁴^sEf i ta'imon, Regah ana obaiyunen

^s 8.13 Rom 14.21 ^h 9.1 Act 22.17-18; 26.16; 1Cor 15.8-9 ⁱ 9.2 2Cor 3.2-3 ^j 9.4 Luk 10.8
^k 9.5 aki a'awi ^l 9.9 Deu 25.4; 1Tim 5.18 ^m 9.9 *cow* orot yahun bobosairen ⁿ 9.10 2Tim 2.6 ^o 9.11 Rom 15.27 ^p 9.12 Act 20.34; 2Cor 11.9 ^q 9.13 Deu 18.1-3 ^r 9.14 Mat 10.10; Gal 6.6

turamaim na'atube eo, "Sabuw iyab tur gewasin tibibinan hai ma gewas isan baibais kafai i nati'ine nan hinab."

¹⁵ Baise ayu iti fair men kafa'imo ta abutubun, naatu iti fef akikirum i men sawar ta kwa biyane bain isan anot ao'omih! Baise mi'itube ata morob, men basit ata ma sabuw afa au ora'ara'at tur hitabotabir yabin en tamatar. ¹⁶ Tur gewasin abibinan isan men imaim au fair anab anao ra'ara'atamih, nati bowabow i ayu hiyunu abowabow. Naatu tur gewasin men ana bibinan kakafin anababatun boro isou namatar! ¹⁷ Anayabin iti bowabow au kokomaim ata rubin ata bowabow baiyan boro atab, baise God ana kokomaim ayu rubinu ana bowabow itu abowabow. ¹⁸ Imih baiyan isan men anao, baise veyab kebor abaibimaim Tur gewasin ana binan, ana baiyan en. Naatu men ayu binanuyan anarouw kwa anifefeyanimih.

¹⁹ Ayu i men yait ta ana fafatum wanawanan ama'ama'amih. Baise ayu taiyuwu ayara'iyu^t sabuw etei hai akir wairafin amatar, saise sabuw moumurih ananawiyih Keriso hinaso'ob. ²⁰ ^u Jew sabuw wanawanahimaim ayu Jew orot amamatar, saise ana buwih, sabuw iyab ofafar babanamaim tema'am ayu imaim ama'am, (baise ofafar men abi'ufunun) saise sabuw ofafarane ana botaitih. ²¹ Sabuw iyab ofafar ufunane tema'am, ayu i hai ma'abe bairi ama'am, (iti na'atube asisinaf i men God ana ofafar ufunane ama'am baise Keriso ana ofafar wanawanan ama'am) saise sabuw ofafar ufunane tema'am abow Keriso wanawanan tirur. ²² ^v Sabuw ririmih wanawanah ayu ariririm, saise ririmih anabuwih. Sawar ta ta etei hai naniyan amatar sabuw etei isah abotawiy, saise ef menatanane nabobotawiy sabuw turin aniyawas. ²³ Ayu iti asisinaf anayabin Tur gewasin isan, saise tur gewasin ana baigegewasin turin anab.

²⁴ Nunuwayah kwana'itih, sabuw etei tinununuw baise orot ta'imon boro nanunuw so'ar ana siwar nab. Imih yuwa kwana'asfofor kwananunuw saise siwar kwanab.

²⁵ ^w Fafowayah etei bai'a'it fokarin wanawanan hinarun naatu hinan hai siwar hinab, nati siwar i boro natafofor, baise it abisa tasisinaf i ata siwar wanatowan ema'am bain isan tabowabow. ²⁶ Isan imih ayu men orot afa tinununuw kwanekwan na'atube anununuwamih baise au etawanamaim anununuw, na'atube au baiyow i men asir aroberob kwanekwan, orot baiyowayan eroberob kwanekwan na'atube. ²⁷ ^x Baise ayu biyou arab baikwatutunen fokarin aitin ayamutufur.^y Imaibo tur sabuw afa isah abibinan saise etei nunuw wanawanan hinarun asir ayu boro hinabotaitu siwar baina'e anama.

^s 9.16 Jer 20.9 ^t 9.19 aiwa'an ^u 9.20 Act 21.20-26 ^v 9.22 2Cor 11.29 ^w 9.25 Php 3.14; 2Tim 2.4-5; 4.7-8 ^x 9.27 Rom 8.13; 13.14 ^y 9.27 abai are awasatan

Wagabur Hai Kwafiren Ana Baimatnuwen

10 ^{1z}Taitu, ata a'agir Moses nawiyih hititit ana vey a abisa isah mamatar i kwananot. Ata a'agir etei rofom re tafafarih nawiyih Red Sea yan owasasin hirabon rewan rounane hiyen. ²Rofom wanawanan naatu riy wanawanan hirarabon ana vey a, etei bapataito hibai Moses ana bai'ufununayah himatar. ^{3c}Naatu Ayubih ana bay itinin ta'imon marane hire'er etei hibow hi'aa. ^{4b}Na'atube ayubit ana harew itinin ta'imon marane re'er etei hitom, naatu ayubit ana To'one harew tit hitomatom nawiyih bairi hin, nati to i Keriso taiyuwin. ^{5c}Baise God ata a'agir moumurih na'in isah men iyasisir, imih himorob arar yan hai rarik^d awan karatan.

^{6e}Naatu sawar iti himamatar i bai'obaiyen na'atube it isat, ebimatnuwit saise men kakafin sinafumih nakura'ara'ahit hisisinafube tanasinafumih. ⁷Wagabur ata a'agir sawar iu'inuwi hikwakwafirih na'atube tanasinafumih. Buk Atamaninamaim iti na'atube eo "Sabuw himare hiyuw hi'aa hibiysisir, hai yasisir botabir hitom hikoko'aw himisir hiwa'an kwanekwan. ^{8g}Imih uwatanah afa hibiwa'an kwanekwanabe men taniwa'an kwanekwan, anayabin nati na'atube hisisinaf, vey a ta'imon wanawanan sabuw etei 23,000 ah uy hire himorob. ^{9h}Ata Regah men routobonamaim tanayai, uwatanah afa na'atube hisinaf Regah hirurutubun etei tuwamorob yubih himorob. ¹⁰ⁱMen tanagam kwanekwan, anayabin afa na'atube hisisinaf gurugurusen ana tounamatar na etei rouw himorob.

¹¹Sawar iti himamatar etei i bai'obaiyen na'atube it isat, naatu baimatnuwit isan bukamaim hikirum. Anayabin vey a iti boun tama'ama i tana mar yomanin tatit. ¹²Imih o yait kunotanot i kubatabatkikin, inakaif gewas men inare'emih. ¹³Routobon mar etei o kubaib na'atube, nati routobon ta'imon sabuw etei tebaib. Baise God ana omatanen mar etei ekakaif. Imih boro men nihamiy routobon gagamin inab a fair nanatabir a niyaweyaw inare'emih. Baise routobon inabaib ana vey a i boro fair nit inabatkin naatu ef nabotawiy inahaiw inatit.

Regah Anaa Fufun Naatu Wagabur Hai Hiyuw

¹⁴Isan imih au ofonah, wagabur hai bowabow etei kwanihamiyen. ¹⁵Ayu iti tur i kwa not wairafi isa ao, saise au tur naniyan kwanab abisa ao kwana'itin. ^{16j}Merarayow ana kerowas imaim God ana merar tayiy

^z 10.1 Exo 13.21-22; 14.22-29 ^a 10.3 Exo 16.35 ^b 10.4 Exo 17.6; Num 20.11

^c 10.5 Num 14.29-30 ^d 10.5 hai rahawat ^e 10.6 Num 11.4, 34; 1Cor 10.11 ^f 10.7 Exo

32.6 ^g 10.8 Num 25.1-9 ^h 10.9 Num 21.5-6 ⁱ 10.10 Num 16.41-49 ^j 10.16 Mat 26.26-28

tatomatom ana vey, Keriso ana rara etei tafafaram. Naatu rafi y taimasib ta'ani'aan ana vey it etei'imak Keriso biyan tafafaram. ^{17k}Anayabin rafi y fafar i ta'imon, it moumurit na'in, baise biyat i ta'imon, imih rafi y ta'imon tafafaram.

^{18l}Israel sabuw hai sinaf i kwananot. *Sheep* tebow terouw gem tafanamaim tisibor finimih turih tefaram ta'aau i God bairi nati'imaim tibia'timon maiye.

^{19m}Men kwananot ayu nati wagabur naatu sibor nati wagabur isah kwasisibor i abibasit kwanarouw. ²⁰ⁿEn! Baise, abisa au'uwi ana'an i iti na'atube. Eteni Sabuw hai sibor i wagabur isah tisisibor, men God isan. Imih ayu men akok kwa wagabur bairi kwanikofan. ^{21o}Kwa men karam boro Regah ana kerowasamaim kwanatom, naatu iban maiye wagabur hai kerowasimaim kwanatom. Naatu men karam Regah ana gem kakafiyinamaim kwanaa, naatu wagabur ana gem tafanamaim kwanaa maiye. ^{22p}Men tanasinaf Regah ana yaso'ar tanakura'ahimih. Kwanotanot it Regah ana fair tanatabir? En!

Baitumatumayah Fatufatumane Hit

^{23q}Sawar etei i sinaf isan hibasit, baise sawar etei boro men ta ana gewasin nitimih. Naatu sawar etei i sinaf isan hibasit, baise sawar etei boro men hinibaisimih. ^{24r}Men yait ta akisin ana gewasin nanuwetamih, baise taituwan hai gewasin nanuwet.

^{25A}har efanamaim masanuw kwanatotobon kwana'aamo, men anot hinamour kwanibatebatemih. ^{26s}Anayabin Buk Atamaninamaim iti na'atube eo, "Me yan sawar tutufin etei tema'am i Regah nowan."

²⁷Orot baitumatum atin nifefeyani airi bay aamih kwanamare abisa namaim nayayare ina'aan, men anot hinamour inibatebatemih. ^{28t}Baise orot ta tainimaim na'afare nao, "Iti bay i wagabur isah hisibor." Nati bay men ina'aan, orot eo'otani i inakakafi y anayabin masanuw ina'ani'aan boro inasinaf kakaf. ²⁹Nati i men o kakafin kuisinafumih, baise orot nati eo'otani na'iti boro o kakafin sinaf narouw nao. Aisim boro ayu au roufamen abaib sabuw afa hai notamaim ayu hinafufunu? ^{30u}"Ayu au bay isan God aifefeyan igegewasin abai ani'aan, aisim sabuw boro au bay abigegewasin isan kakafin hinarouw hinao?"

^{31v}Imih abisa ku'ani'aan o kutomatom o kuisinaf etei God wabin bora'ara'ahin isan inasinaf. ^{32w}Jew sabuw, Greek sabuw, na'atube ekaleisia sabuw wanawanahimaim men yait ta iniwa'an yababan nab

^k 10.17 Rom 12.5 ^l 10.18 Lev 7.6 ^m 10.19 1Cor 8.4 ⁿ 10.20 Deu 32.17; Rev 9.20

^o 10.21 2Cor 6.15-16 ^p 10.22 Deu 32.21 ^q 10.23 1Cor 6.12 ^r 10.24 Rom 15.1-2

^s 10.26 Psa 24.1 ^t 10.28 1Cor 8.7 ^u 10.30 1Tim 4.4 ^v 10.31 Col 3.17 ^w 10.32 Rom 14.13

nare'emih. ³³xAyu i mar etei asisinaftobon sabuw afa aniyasisirih, saise anibaisih yawas hinab, men ayu taiyuwu aniyasisiru.

11 ¹yAyu Keriso abi'u'ur na'atube kwa ayu kwani'u'uru.

Kwafiren Ana Ef Gagamih Roumutufuren

²Ayu sawar ta ta'amaim mar etei kwanunuhu isan naatu bai'obaiyen abit kwabukikin kwama'am isan, a merar ayi abobora'ara'ahi.

³zBaise boun ayu akokok kwa etei kwanaso'ob gewas. Keriso i orot ana ukwarin, Babin ana ukwarin i orot naatu Keriso ana ukwarin i God.

⁴Orot yait aribun sumasum auman eyoyoyoban, o tur God biyanane baib eo'orereb Keriso biya'ohow ebitin. ⁵Naatu babin yait aribun ana sumasum bosair eyoyoyoban, o tur God biyanane bai eo'orereb, aawan biya'ohow ebitin, ana itinin i babin aribun himafuribe. ⁶Babin yait aribun men nasumisum, gewasin aribun hina'afuw. Baise babin aribun afuwin o mafurin isan biyan nao'ohow na'at gewasin aribun nasum. ⁷aOrot aribun men nasum, anayabin orot i God ana itinin naatu ana fair, baise babin i orot ana fair. ⁸bAnayabin orot i men babinane namih, baise babin i orotone na. ⁹Na'atube orot i men babin isan God eo matar, baise babin i orot isan matar.

¹⁰Ana'anaban iti isan, tounamatar matahimaim babin aribun nasum, saise nati sumasumamaim ebi'obaiyit, babin i orot ana fair babanamaim ema'am. ¹¹Regah ana yawasamaim tama'am babin men orot nihamiy akisin nabin ana fairamaim nama, na'atube orot men babin nihamiy akisin nabin ana fairamaim nama. ¹²Anayabin babin orotone na, na'atube babin biyanane taub orot yai. Baise sawar etei i Godane hina. ¹³Taiyuw kwanibatiy kwana'itin, babin aribun ana sumasum nabosair, bebeyanamaim nayoyoyoban i gewasin ai en? ¹⁴It ata so'ob i sawar biyatamaim temamatar imaim ebi'obaiyit, orot aribun ituw manin ere'er i boro biyan na'ohow. ¹⁵Baise babin aribun ituw manin ere'ere i ana itinin ebigewasin. Anayabin aribun manin re'ere i yumatan ana sumasum na'atube. ¹⁶Baise orot yait ayu ao isan inagamigam, anao inanowar. Kwafiren isan ata ef men ta ema'am boro imaim tani'ufunun o God ana ekaleisia wanawanan kwafiren ana ef men ta ema'am boro i tani'a'ait.

Regah Anaa Aafufun

(Matthew 26.26-29; Mark 14.22-25; Luke 22.14-20)

¹⁷Roube'aten tur iti anao kwananowar. Ayu kwa boro men merarayow anitimih. Anayabin kwaru'ay a kou'ay kwabaib wanawanan kakafin i erara'at naatu ana gewasin i en. ¹⁸cAyu tur anowar kwa ekaleisia

x **10.33** 1Cor 9.20-22 y **11.1** 1Cor 4.16 z **11.3** Gen 3.16; Eph 5.23 a **11.7** Gen 1.26-27

b **11.8-9** Gen 2.18-23 c **11.18** 1Cor 1.10-12

tutufin etei kwana kwabita'imon akwafiren wanawan i kouseb ema'am, naatu ayu abitumatum iti i tur anababatun. ¹⁹Men kwanakasiy, wanawananamaim kouseb iti na'atube emamatar, saise orot iyab sinaf gewasin tisisinaf boro bebeyan hinatit kwana'itih. ²⁰Kwaruru'ay ana veyaa kwa i men Regah ana Bay Aafufun kwa'aau'umih. ²¹Anayabin bay aa ana veyaa orot afa timatkabikabiy te'aa harew fokarih tetom tibikoko'aw, naatu sabuw afa i tibi'aamoromorob. ²²Kwa a bar tema'am boro imaim kwataa kwatatom ai en? Aisim iti na'atube kwasinaf God ana ekaleisia kwabi'afiy, naatu yababan wairafih biya'ohow kwabiti. Kwanotanot boro abisa anao kwananowar, a merar anay nati kwasisinaf isan? Boro men kafa'imo a merar anayimih.

²³Anayabin ayu Regah biyanane abisa abaib i kwa ai'obaiyi. Ata Regah gugumin hiyayanuw ana maramaim rafiy bai ²⁴God ana merar yi imasib itih eo, "Iti i ayu biyau kwa abit, kwanab kwana'ani'aan ana maramaim ayu kwananuhu." ²⁵^dEf ta'imon kerowas isan na'atube sinaf, bay hi'aa ufunamaim kerowas *wine* hisuwai batabat bai, God ana merar yi, iuwih eo, "Iti kerowas i God ana Obaibasit Boubun ayu au rara'amaim ebubusuruf. Imih mar etei iti na'atube kwanasinaf, kwanatomatom ana maramaim ayu kwanuhu." ²⁶Mar etei iti rafiy kwana'aan, kerowasamaim *wine* kwanatom, naatu Regah momorob isan kwanabinan kwananan i namatabir maiye nan natit.

²⁷^eIsan imih orot yait erebosa rafiy nab na'aan naatu Regah ana kerowasamaim natomatom, nati orot i bowabow kakafin maiyow Regah biyan naatu ana rara isan esisinaf kakaf. ²⁸Imih wantoro'ot orot taiyuwin ana yawas nanutitiy na'itin gewas, imaibo rafiy nab na'aan naatu kerowas nab natom. ²⁹Anayabin orot yait Regah biyan naatu ana rara hai buriburih men naso'ob gewas, rafiy nab na'aan naatu kerowasamaim *wine* natomatom, i taiyuwin ana baibatiyen bai enan. ³⁰Ana'an iti isan kwa moumur na'in biyah hiririm naatu kwabisasawuw naatu afa i himoroboka. ³¹Baise it taiyuwit anababatun tanabibatiyit gewas, boro men tanan God nibatiyitamih. ³²Baise Regah nabibatiyit ana veyaa baikwatutunen boro nitit, naatu God tafaram baimakiy nabitin it boro men auman nititamih.

³³Isan imih taituwau, Regah ana Bay Aafufun isan kwanaruru'ay taituwa kwanakaifih. ³⁴Naatu orot yait aa momorob gewasin ana baremaim bay naa, saise a kou'ay kwanabaib ana maramaim boro men God ana baibatiyen wanawanan narun. Naatu sawar afa i boro ayu anan anatitabo anayabuna.

Ayubit Ana Usar

12 ¹Boun i kwa Anun Kakafiyin ana usar isan kwabibat i anao kwananowar. Taitu ayu men akokok kwa aur kasiy na'atube

^d 11.25 Exo 24.6-8; Heb 8.8-13 ^e 11.27 Heb 10.29 ^f 11.32 Heb 12.5-6

nama'amih. ² Kwanaso'ob kwa baikirisiyana'e, Eteni kwama'am ana vey, wagabur hibonawiy a ef kwawasa'ir kwatit sawar inu'inuwi kwakwafirih. ³ Isan imih a tur ao'owen, orot yait God Anunin tatargabuw men karam boro Jesu nao raraf, naatu orot yait wanawananamaim Anun Kakafiyin men ema'am boro men karam naorereb, "Jesu i Regah."

⁴ Usar i yumatan yumatan, baise Anunin i ta'imon efafaram. ⁵ Bowabow i yumatan ta ta tabowabow, baise Regah i ta'imon isan tabowabow.

⁶ Bowabow hai fair i yumatah ta ta tabowabow, baise God ta'imon bowabow ana fair orot ta'ita'imon wanawanahimaim faram tebowabow.

⁷ Orot ta'ita'imon biyahimaim Anun Kakafiyin ana taragub ef tata'ane ebirerereb saise sabuw etei hina'itin ana baigegewasin hinab. ⁸ Anunin orot ta isan boro ukwar rerekab ana usar nitin, naatu orot ta boro not so'ob ana usar nitin. ⁹ Anun ta'imonaban orot ta isan boro baitumatum ana usar nitin, naatu orot ta boro sabuw baiyawasih isan ana usar nitin. ¹⁰ Orot ta ina'inan fokarih sinaf isan ana fair boro nitin, orot ta boro dinabatur orereb isan ana usar nitin, naatu orot ta boro turobe baifuwen hairi orereb yamutufurin isan ana usar nitin. Orot ta menan botabirin tur ta o isan ana usar boro nitin, orot ta tur koubuna isan usar boro nitin. ¹¹ Baise iti bowabow etei i God Anunin ta'imon akisinamo sawar etei esisinaf, naatu i ana kokomaim usar orot babin ta ta rubinih ebitih.

Biyat Ta'imon Baise Kusisib

¹² ^k Biyat ana itinin i men ta'imonamaim wowab yenamih, baise yow kusisib an moumurih na'in, naatu kukusisib i moumurih, baise biyat i ta'imon maiyow. Keriso ana'itinaban nati na'atube. ¹³ ^l Ana itinin i ta'imon. O Jew orot, o Greek orot, akir orot, roufamen orot, it etei i Anunin ta'imonamaim bapataito tabai biyat ta'imon matar, naatu God Anunin ta'imon ayubit ana harew dogorotamaim isuwaire.

¹⁴ Biyat i men ta'imon wowab yen biyat tutufin mataramih, baise famen moumurin na'in na ikokofan biyat matar. ¹⁵ Naatu at iti na'atube nao, "Ayu i men o uma, imih ayu men o biya turin." Nati na'atube nao men karam boro akisin nabin nabat. ¹⁶ Naatu tainit nao, "Ayu i men o mata, imih men o biya turin." Nati na'at nao i men karam boro akisin nabin nabat. ¹⁷ Naatu biyat tutufin etei i matatawat tama'am na'at, tur boro mi'itube tatanowar? Naatu biyat tutufin etei tainitawat tama'am na'at, sawar yamurih boro mi'itube tatayon? ¹⁸ Baise boun tama'am kwana'itin, God biyat etei yakitifuw gewas, ta'ita'imon hai efanamaim ya, ikokofan wowab yen biyat matar. ¹⁹ Biyat wowowab ana itinin ta'imon tama'am

^g 12.2 Hab 2.18-19 ^h 12.3 1Jn 4.2-3 ⁱ 12.4 Rom 12.6, 8 ^j 12.11 1Cor 7.7 ^k 12.12 1Cor 10.17 ^l 12.13 Gal 3.28

na'at, biyat ana itinin boro ai'ab. ²⁰Imih biyat i yow kukusisib ana itinin mounurih na'in, baise an i ta'imon.

²¹Isan imih matat men karam umat isan nao, "Ayu o a baibais men akokok," na'tube ukwarit men karam at isan nao, "Ayu o a baibais men akokok." ²²En baise, biyat turin ririmin tarouw tao'o men karam boro tanakusair, nati i biyat ana fair turin. ²³Naatu biyat turin isan tanotanot i men hai yabin auman, biyat nati i tabi'abur gewas, naatu biyat turin wabih su'ubin isan awat ihihiririy, ana kaifin i wa'iwa'irin. ²⁴Biyat turin men bai'usin gewas isan tanotanotamih, baise biyat tutufin etei God ita'imon wowab ikawarafut, saise biyat turin ta'itin yabin en tao'o i auman tanabora'ah. ²⁵Saise biyat men nagam nakuseb, baise famefamen etei taiyuwih hinibit aba'abar yabowamaim hinibaibaisbonen hinama. ²⁶Biyat turin ebi'akir biyat tutufin etei ni'akir, biyat turin ebiyasisir biyat tutufin etei ana yasisir hinafaram.

^{27m}Naatu boun kwa etei i Keriso biyan, naatu kwa ta'ita'imon i biyan turin kwamatar. ²⁸ⁿGod ana Ekaleisia wanawanan sabuw hai efan ya, wantoro'ot, tur abarayah, bairou'abin dinab oro'orot, baitounin bai'obaiyenayah, imaibo ina'inan sinafuyah, sawusawuwih baiyawasihiyah, sabuw afa baibaisihiyah, bowabow hai yamutufurenayah, naatu menah botabirin tur ta ta oyah, etei hai usar faramih hai efan ya. ²⁹Orot etei boro men hinan tur abarayah hinamatar, o dinab orot hinamatar, o bai'obaiyenayah hinamatar, o fair hinab ina'inan sinafuyah hinamatar, ^{30o}sawow yumatah ta ta baiyawasihiyah, o menah botabirin tur ta ta oyah, o tur botabirin koubuna'ayah. En baise etei ata usar ta ta tabai. ^{31o}Imih dogor wanawanan o a kok gagamin a usar menatan inab inabowabow i akisin kunuwih kubai.

Naatu boun i boro ef gewasin anababatun ani'obaiyi kwana'itin.

Yabow

13 ¹Ayu i karam boro menau nabotabir sabuw hai turamaim anao, o tounamatar hai tur anao, baise auru yabow en na'at, au tur ao i naniyan en ber terab etefotef na'tube. ^{2p}Naatu ayu i God biyanane tur abai ao'orereb, ayu i so'ob wairafu, tur wa'iwa'irih hai kirikirifot etei aso'ob, ayu i baitumatum auru karam oyaw anao na'uy ra'ah nan. Baise auru yabow en na'at, ayu i au yabin en. ³Ayu karam au sawar etei yababan sabuw ana faramih naatu biyau ana kwahir siboromih hina'afun, baise auru yabow en na'at, ana gewasin boro men ta anab.

⁴Yabow i yatenuban, yabow i koununub gewasin, yabow i men baibobowenayan,^q men bai'o'orotoyan, men ora'ara'atayan, men

^m 12.27 Rom 12.5 ⁿ 12.28 Eph 4.11-12 ^o 12.31 1Cor 14:1 ^p 13.2 Mat 17.20

^q 13.4 matan fefek

baitengogorayan, ⁵yabow i men okwanekwaneyan, yabow men i taiyuwin ana gewasin enunuwetamih, men baiyaso'arayan, sabuw hai kakafih ana bukamaim men ekikirum, ⁶yabow kakafin isan men ebiyasisir, baise turobe isan i ebiyasisir. ⁷Yabow i mar etei etatafatar, mar etei ebitumatum, mar etei nuhifotamaim ema'am, mar etei ebitafofor.

⁸Yabow i ana yomanin en,^t dinabatur tao'orereb boro nasawar, menat ebotabir tur afa tao etei boro hinanutanub, abisa tasoso'ob etei boro nasisinasair. ⁹Anayabin it i turinawat taso'ob, naatu dinabatur tur i turinawat tao'orereb. boro men tutufin tanaorereb nan yomanin tanisawarimih. ¹⁰Baise koubaitotor ana veyananan, sawar men koubatotoramaim ti'inu'in boro nasawar.

¹¹Kek ana veyan, kek hai tur ao, kek hai not anot, kek hai naniyanamaim ama, boun ana abi'orot ana veyan, kek ana bowabow etei aihamiy. ¹²Abisa boun ta'i'itin i men ta'i'inan gewas, anayabin kiyam^u matan sukwayan na'atube, imih God men tai'itin gewas, baise veyananan, imaibo yumatan boro tana'itin naatu itabo yumatat na'itin. Naatu sawar tutufin etei boro tanaso'ob nan na'asa'ub, boun i turinawat taso'ob.

¹³^vNaatu boun i sawar tounu tema'am, baitumatum, nuhifot, yabow, baise wanawanahimaim yabow i gagamin.

Dinabatur Orereb Naatu Menat Botabirin Ana Usar

14 ¹^wYabow i ayawasamaim wan nama nabonawiy, naatu dogor wanawanan akok gagamin Anun Kakafiyin usar bai enan akisin kwananuwiw kwanab, usar gewasin naatu au gagamin i God ana tur binan ana usar kwanab. ²Orot yait menan botabir tur ta'amaim eo i men sabuw isah eo, baise God isan eo. Anayabin men yait ta so'ob tur boro nanowar naniyan nab, nati tur i Anun Kakafiyin ana fairane tur anababatun wa'iwa'irin eo. ³Baise orot yait God ana tur eo ebibinan i sabuw isah eo baibais, koufair, nuhifot ebitih. ⁴Yait menan botabir tur ta'amaim eo, nati i taiyuwin ebibais. Baise orot yait God ana tur eo ebibinan, i God ana sabuw tutufin etei ebibaisih. ⁵Ayu au kok kwa etei mena tabotabir tur ta'amaim kwatao, baise au kok gagamin anababatun i binan ana usar kwatab, anayabin orot yait tur eo ebibinan ana baibais i gagamin. Orot menan ebobotabir i gewasin, baise orot ta nati kou'ay wanawanan tur nabotabir nao ekaleisia etei hinanowar saise boro nibaisih.

⁶Naatu taitu, ayu atan kwa ata binanawan ana veyan, menau tabotabir tur ta'amaim atao'o na'at boro baibais atit? Baise tur boubuh, not so'ob boubuh, tur binan God biyanane, naatu God ana roube'aten tur ana

^t 13.6 Rom 12.9 ^s 13.7 1Pet 4.8 ^t 13.8 taragub ana tur ^u 13.12 mirror ^v 13.13 1Th 1.3 ^w 14.1 1Cor 12.31; 14.39

bow anan, turobe boro imaim nibaisi. ⁷Ef ta iti na'atube, ben hai sawar douduf na'atube hinirabirab, o fik na'atube hinababin kwanekwan orot benayan boro mi'itube naniyan nab nabeng was? ⁸Naatu orot yait tour men ehababin gewas, baiyowayah boro mi'itube hinaso'ob gewas hibobuna baiyow isan? ⁹Ana itinin i ta'imon, o mena nabotabir tur ta sabuw men hisoso'obamaim kuo, sabuw boro mi'itube naniyan hinab o abisa isan kuo? O a tur asir isaroun me yan ere'er. ¹⁰Tafaram wanawanan tur i moumurih maiyow, naatu nati tur etei i hai yabih auman men ta yabin enamih. ¹¹Isan imih tur nidun anonowar naniyan men abaib ayu i touman orot amatar, nati orot tur oyan isan, naatu tur oyan auman ayu isou touman orot matar. ¹²Imih o yait a kok gagamin i ayubit ana usar ta inab inabow, basit God kwi'fefeyan saise usar menatan o inab ekalesia inabibais boro nit.

¹³Ana'an iti isan sabuw iyab menah ebobotabir, gewasin hinayoyoban, saise tur koubuna isan ana usar auman hinab hinakubuna sabuw hinaso'ob. ¹⁴Anayabin ayu mena'umaim ayoyoyoban, ayubu auman ibo eyoyoyoban, baise au not men kafa'imo so'ob ayu abisa ao'o. ¹⁵Ayu boro abisa anasinaf? gewasin ayu i boro ayubu airi anayoyoban, naatu au not auman airi anayoyoban, ayubu airi ew anatabor naatu au not auman airi anatabor. ¹⁶Ayubimaim God ana merar iyi kubobora'ara'ah, orot ta boro mi'itube naso'ob airi God kwanabora'ara'ah, naatu boro mi'itube naso'ob nibasit. Anayabin nati orot i men so'ob o abisa'awat kuo'o. ¹⁷Basit o i merarayow gewasin maiyow God kubitin dogor tutufin etei, baise taituwa nati na ebatabat men kubibais.

¹⁸Ayu i God ana merar ayiy, anayabin ayu menau botabirin tur ta'amaim o isan kwa etei ana tabir. ¹⁹Baise ekalesia hai kou'ay wanawanan ayu tur etei *five* akisin anao sabuw etei boro naniyan hinab naatu nibaisih, baise menau nabotabir tur 10,000 na'atube anao ana baibais i en.

²⁰^xTaituwau, men kek hai notabe kwananot, men kek sosofabe kwanarerey kwanekwanemih, baise orot babin hai not kwanab tur kwanao. ²¹^yBuk Atamaninamaim wanawanan ofafar iti na'atube hikirum, "Ayu au sabuw isah tur men hisoso'obamaim boro anao, naatu nah toumanih menahimaim boro anao, baise au tur boro men hinanowar Regah iti na'atube eo.

²²Menat ebobotabir i men sabuw baitumatumayah hai i'inan, baise sabuw iyab men tibitumatum hai i'inanen, naatu tur binan i sabuw iyab men tibitumatum isah, baise baitumatumayah isah. ²³^zImih ekaleisia tutufin etei hinaru'ay, naatu sabuw etei menah nabotabir tur ta'amaim

^x 14.20 Eph 4.14 ^y 14.21 Isa 28.11-12 ^z 14.23 Act 2.13

hinao'o, sabuw afa ufunane hina tema'am, naatu sabuw iyab men tibitumatum boro hinao, "Sabuw tibikoko'aw kwa'itih?" ²⁴ ^aBaise orot yait God ana tur eo ebibinan ufun orot baitumatum atin ma enonowar boro dogoron narusib. Anayabin tur abisa nonowar ana kakafih etei hina hibebeyan itan. ²⁵ Ana not wa'iwa'irin ma'am etei tit irerereb naatu boro sun nayowen Regah nakwafir, bebeyanamaim naorerereb nao, "Turobe God i kwa wanawananamaim bairi kwama'am!"

Kwafiren I Ana Kakaf Auman

²⁶ ^bTaituwau, abisa ao yabin i iti, bora'ara'aten isan kwanaruru'ay ana vey, orot boro ew nabor, orot ta boro ni'obaibiyi, orot ta boro God ana tur naorerereb, orot ta boro menan nabotabir, orot ta boro nati tur nabotabir nakubuna kwananowar, naatu sawar iti etei i ekaleisia wowabin ra'at isan kwasisinaf. ²⁷ Menamaim omih orot rou'ab o tounu hinao naatu men tounu nanatabir, naatu tur i orot ta nao nasawar, imaibo ta nao, men auta'imon kwanarahimih, naatu orot ta i nati tur nabotabir nakubuna. ²⁸ Baise koubuna'ayan orot nati'imaim men nama'am na'at, orot nati tur eo gewasin ekaleisia wanawanan boro awan nafot, i akisin God hairi'imo hinayoyoban.

²⁹ ^cOrot rou'ab o tounu God ana tur hinabinan, naatu hinabibinan wanawanan, binanuyah afa nati tibibinan hai tur hinafufun gewas. ³⁰ Naatu nati tur inan wanawanan orot ta kou'ay wanawanan ma'am God ana tur ta boubun na isan birerereb ana vey, nati orot bat ebibinan awan nafot. ³¹ Anayabin kwa ta'ita'imon a vey a ti'inu'in na'atube boro kwanabinan, saise sabuw etei boro rube'aten tur hinab hinaso'ob naatu koufair hinab. ³² Dinab oro'orot iyab God ana tur hio tibibinan hai tur i hinakaif gewas. ³³ Anayabin i men baibikwarisen ana Godamih, baise tufuw ana God.

God ana ekaleisia tutufin etei tiruru'ay ana vey, ³⁴ ^dEkalesia wanawananamaim baibin i awah nafot hinama. Baibin isah men baibasit ema'am boro tur hinao, baise ofafar eo na'atube awah nafot orot babahimaim hinanutanub hinama.

³⁵ Sawar ta isan so'obamih baremaim a'aawah hinibatiyih, anayabin ekaleisia wanawanan baibin tur o isan i biya'ohow ema'am.

³⁶ Kwanotanot God ana tur kwa akis biyamaim busuruf? Ai nati tur i kwa akis isa na? ³⁷ ^eOrot yait enotanot i God ana dinab orot, naatu God biyanane ayubin ana usar bai ema'am, abisa kwa isa akikirum boro naso'ob, iti i Regah ana obaiyunen tur. ³⁸ Baise iti tur nanowar nakwakwahir, God boro ibo nakwahir ana tur men nanowar.

^a 14.24 Jn 16.8 ^b 14.26 1Cor 12.8-10 ^c 14.29 1Th 5.21 ^d 14.34 1Cor 11.3; 1Tim 2.12
^e 14.37 1Jn 4.6

³⁹Isan imih taituwau, dogor kwanabotawiy God ana tur kwanab gewas kwanabinan, naatu sabuw afa menah botabir teo men kwana'otanih.

⁴⁰Baise kwana'itin gewas sawar etei i hai efamaim kwanasinaf naatu kakaf ana efamaim.

Keriso Morobone Misir Maiye

15 ¹Taitu, boun i akokok tur gewasin abinan kwanowar, imaim yawas kwabai, naatu imaim kwabatabtkikin isan nuhi akukusib.

²Iti tur gewasinamaim kwa iyawasi, imih tur abinan kwanonowar kwanabubukikin, baise men kwanabubukikin kwa a baitumatum boro nan yabin en namatar.

³Ayu abisa abaib i kwa isa aya'abun, naatu nati tur ana'an gagamin i iti, Keriso it ata bowabow kakafin isan morob, Bukamaim eo na'atube.

⁴Hibai hin hubemaim hiyai, vey a tounu ufunamaim misir maiye, Bukamaim eo na'atube. ⁵^hPeter isan irerereb, imaibo tur abarayah nah 12 isah irerereb. ⁶Nati ufunamaim vey a ta'imon wanawanan ana bai'ufununayah etei 500 tafanamaim auman isah irerereb, moumurih na'in i boun yawasih tema'am baise afa i himorob. ⁷Nati ufunamaim James isan irerereb, imaibo ana tur abarayah etei isah irerereb.

⁸Uftoro'ot ayu atufuw kokobeya na'atube ama'am isou irerereb.

⁹^kAyu i tur abarayah etei babahimaim imih ayu i men boro tur abarayan hinarouw hinao, anayabin God ana ekaleisia ai nununih arouw ai'a'akirih. ¹⁰Baise God ana manaw ana kabeberamaim ayu tur abarayan amatar, naatu manaw kabeber ayu bitu i men yabin en, baise bowabow gagamin na'in abow, tur abarayah etei ana tabirih, men ayu au fairamaim abowabowamih, baise God ana manaw ana kabeber ayu wanawana'umaim ma ebowabow. ¹¹Isan imih i tibibinan naatu ayu abibinan ana itinin i men ta'amih, baise ana'an gagamin i abisa abibinan i kwa kwaitumatum.

Moroboyah Misir Maiye

¹²Boun aki abibinan ai tur i Keriso morobone mimisir isan ao'o, baise mi'tube'emih kwa afa kwao moroboyah boro men hinayawas maiye hinamisir? ¹³Morobone misir maiye men nama'am na'at, ana itinin Keriso morobone men misir maiye'emih. ¹⁴Naatu Keriso morobone men tamimisir maiye na'at, aki ai binan i yabin en, naatu kwa Keriso kwabitumitum auman i yabin en. ¹⁵Naatu murumurubih men hinamimisir maiye na'at, aki i God isan abifufuwen. Anayabin Keriso morobone God baiyawasin arouw ao, naatu moroboyah morobone men

^f 15.3 Isa 53.5-12 ^g 15.4 Mat 12.40; Act 2.24-32 ^h 15.5 Mat 28.16-17; Luk 24.34

ⁱ 15.7 Act 1.3-4 ^j 15.8 Act 9.3-6 ^k 15.9 Eph 3.8; 1Tim 1.15 ^l 15.10 2Cor 11.23

hinamimisir maiye na'at, nati ebiturobe, God Keriso morobone men yawas maiye misirimih. ¹⁶ Morobone misir maiye men nama'am na'at, Keriso morobone men misir maiye. ¹⁷ Naatu Keriso morobone men tamimisir na'at, kwa a baitumatum i yabin en, naatu kwa i boro'ika bowabow kakafin tafatumi kwatama'ama. ¹⁸ Naatu iban maiye sabuw iyab Keriso wabinamaim himomorob ana itinin i hikasiy na'atube. ¹⁹ Keriso wanawananamaim yawas tabai nuhit fot tama'am. Baise ata yawas i iti tafaram akisin isan tanama tananotanot na'at. It i tafaram wananwanan ana gonenet sabuw tamatar.

²⁰ Baise turobe Keriso i anababatun morobone misir maiye, God ana sabuw iyab himomorob wanawanahimaim Keriso i wan morobone misir. ²¹ ^m Anayabin orot ta'imon ana sinafumaim morob matar, imih orot ta'imon ana sinafumaim morobone misir maiye matar. ²² Sabuw etei tamomorob, anayabin Adam ana rara, naatu morobone boro tanamisir maiye anayabin Keriso yawasin ema'am. ²³ ⁿ Baise morobone tanamimisir maiye, i boro koumutufuren inu'in na'atube hinabusuruf, wantoro'ot boro Keriso namisir, naatu nanan ana vey sabuw iyab Keriso nowan boro hinamisir. ²⁴ Imaibo mar yomanin nan natit, tafaram hai bonawiyenenayah, hai aiwob, hai kaifenayah etei hai fair tutufin Keriso nagugurus ufunamaim, aiwob nab Tamah God nitin. ²⁵ ^o Naatu Keriso i boro ni'aiwob nanan ana rakit sabuw etei nabow nan an babanamaim nawastanen. ²⁶ ^p Naatu uftoro'ot i sawar wabin Morob it ata rakit gagamin boro nagurus nitaiy nare. ²⁷ ^q Anayabin Buk Atamaninamaim eo, "Sawar etei boro nabow an babanamaim naya." Iti tur Sawar etei an babanamaim yara'iyen rouw eo, i rerereb yan, God men i auman bobar eomih, anayabin God sawar etei boro Keriso ana fair babanamaim naya. ²⁸ Sawar hinabow hinan God Natun babanamaim hinaya'ay ufunamaim, Jesu boro Tamah God ana fair babanamaim namare, anayabin sawar etei God bow Natun babanamaim ya, naatu God boro sawar tutufin etei ni'ukwarin ana sabuw etei isah.

²⁹ Naatu morobone misir maiye en na'at, sabuw iyab moroboyah efanih bapataito hibaib boro abistan hinasinaf? Naatu morobone misir maiye en na'at, aisim sabuw moroboyah efanih taih tuwah hina bapataito tebaib? ³⁰ ^r Naatu it auman aisim ata yawas takwahir tatit vey matan tayi tabowabow? ³¹ Taitu ayu i mar etei morob ana efanamaim ama'am. Anayabin sawar abisa Keriso kwa isa sisinaf imaim ayu kura'ara'ahu iti tur akukurerereb. ³² ^s Morob ufunamaim yawas men tama'am, aisim ayu iti Ephesus hai sigarafor bairi atiyow? Abisa ana gewasin boro anab? Morobone misir maiye en na'at.

^m 15.21 Rom 5.12 ⁿ 15.23 1Th 4.16; Rev 20.5 ^o 15.25 Mat 22.44 ^p 15.26 Rev 20.14
^q 15.27 Psa 8.6 ^r 15.30 Rom 8.36 ^s 15.32 Isa 22.13

“Au nowat tanaa tanatom
anayabin maras boro tanamorob.”

³³Men sabuw hinifufuwi a not hinakwaris. “A ofonah kakafih boro ayawas gewasin hinagurus.” ³⁴Ukwar kwanabotawiy gewas, ef kakafih kwasisinaf kwanihamiyen, anayabin kwa afa God men kwaso’ob, iti ao, saise kwa biya hina’ohow.

Misir Maiye Biyan Ana’itin Iti Na’atube

³⁵Sabuw afa boro hinibatiy hinao, “Moroboyah boro mi’tube hinamisir maiye? Naatu hina mimisir biyah ana itinin boro mi’tube hinab?”

³⁶‘Taitu, kwabikoko’aw, ub me yanamaim kutatanum boro men saife nakuboun nayenamih, baise wantoro’ot i boro namorob nare, imaibo nakuboun nayen. ³⁷Naatu sanabey ub o ub afa kutatanum i men biyan tutufin kwatatanumimih, baise ro’on, sanabey ro’on o ub ta ro’on.

³⁸God ub ta’ita’imon biyah hai itinin ta ta i ana kokomaim ya, naatu ub ta’ita’imon biyah anababatun itih. ³⁹Naatu sawar tafaramamaim biyah finimih auman hai itinin i men ta’imon, biyah i ta ta, orotabin biyah ana itinin ta, haru for biyah ana itinin ta, mamu hai itinin i ta naatu siy i hai itinin ta. ⁴⁰Naatu mar ana biyan itinin ibo ta, na’atube tafaram biyan itinin ibo ta. Baise biyat no mar nowan ana bonamanamarin itinin ibo ta, naatu biyat tafaram nowan ana bonamanamarin ibo itinin ta. ⁴¹Veya ibo ana bonamanamarin itinin ta, sumar ibo ana bonamanamarin itinin ta, naatu daman ibo hai bonamanamarin itinin ta, baise daman wanawanahimaim ta’ita’imoh ibo hai bonamanamarin ta ta.

⁴²Baise Moroboyah hinamimisir maiye ana itinin i boro nati na’atube, biyat morob hubemaim tayayare ana veya biyat i emasamas, baise morobone namimisir ufunamaim boro nama wanatowan. ⁴³“Biyat hubemaim tayayare itinin i kakafin, naatu siba’u’un, baise emimisir ana veya itinin i gewasin naatu fairin. ⁴⁴Biyat tayayare i tafaram nowan, baise emimisir i mar biyan.

Imih biyat tafaram nowan ibo ema’am naatu mar nowan ibo ema’am. ⁴⁵“Buk Atamaninamaim hikirum hio na’atube, “Orot wantoro’ot wabin Adam i biyan ana yawas bai,” baise Adam bairou’abin nan i ayubit ana yawas wanatowanin baitit isan na. ⁴⁶Orot ayubit ana yawas auman ma’am i men mat na, baise orot biyat ana yawasamaim ma’am i mat na, imaibo orot ayubit ana yawasamaim ma’am na. ⁴⁷Orot wantoro’ot Adam i me nowan fobobane matar, baise Adam bairou’abin i marane ra’iy. ⁴⁸Sabuw iyab me nowan biyah i orot me’emaim ma’am biyan na’atube, sabuw iyab mar nowan biyah i orot marane rara’iy biyan na’atube. ⁴⁹Tafaram orot ana ana itinin tabaib na’atube, mar ana orot nanan ana itinin boro tanab.

‘ 15.36 Jn 12.24 “ 15.43 Php 3.20-21 ˇ 15.45 Gen 2.7

⁵⁰Taitu, abisa ao au yabin i iti, biyat, naatu finimit men karam boro God ana aiwobomaim narun, anayabin biyat i boro namorob namas, imih men karam boro wanatowan ma'am ana efanamaim narun. ⁵¹^wTain kwanarub gewas, iti tur buriburin anao kwananowar, it etei boro men tanamorobomih, baise ata itinin boro nabotabir bonamanamarin namatar ⁵²tour natut ana vey a namanamar ebowabow na'atube, tanimatanubamo biyat nabotabir. Anayabin tour natut ana vey a murumurubih etei boro biyah fairin hinamisir, naatu biyah ana itinin boro nabotabir. ⁵³^xBiyat iti morob emasamas boro nabotabir biyat fairin wanatowan ma'ama'anin namatar. ⁵⁴^yBiyat iti boun tama'am boro namorob naatu namas, baise morob ufunamaim biyat boro nabotabir nan wanatowan ma'ama ana biyan nab. Imaibo Buk Atamaninamaim hikirum boro nan niturobe, "Morob an uman hitakakiren hiyare."

⁵⁵^z"Morob o a fair menanamaim ema'am boro inisnowah?

Morob o affair menamaim ema'am boro biyababan initi?"

⁵⁶^aMorob ana biyababan i bowabow kakafinane ebaib, naatu bowabow kakafin ana fair i ofafaramaim ebaib. ⁵⁷Baise God ana merar tanay anayabin Jesu Keriso, i morob ana ahay ana waf tagagir yare!

⁵⁸Isan imih taitu, yate nanub kwanabatkikin, mar etei Regah isan anot tutufin kwanabow, anayabin Regah isan kwabow kwabi'akir i men anayabin enamih, baise yabin auman.

Corinth Sabuw Hai Siwar Jerusalem Baitumatumayah Isah

16 ¹^bSiwar God ana sabuw isah o'on baiyafarinamih kwao i boro ayu ekaleisia no Galasia'amaim sinafumih au'uwihibe kwanasinaf. ²*Sunday* ta'ita'imon kwa a mour ana fofonin kabay turin kwanayasaisir kwanita'ay, saise ayu ananan i boro men kabay tanao'onamih. ³Ayu anan anatitit ana vey a, orot iyab kwarubinih tema'am isah boro fef anakirum anitih naatu aniya'farih a siwar hinab hinan Jerusalem. ⁴Ayu bairi namih hinanotanot na'at basit boro ayu hinakofanu bairi anan.

Paul Ana Remor Isan Yakitifuwen

⁵^cAyu ufibo boro kwa isa anan, mat boro Masedonia anatit, anayabin ayu i Masedonia wanawanamaim remor isan ayayakitifuw. ⁶^dAnotanot vey a maninaka boro kwa bairit tanama, men aso'ob rarab siba'u tutufin etei boro tanama. Imaibo boro kwanibaisu au remor ana kofan maiye efan ta'amaim. ⁷Ayu men akokok anan mar kafai bairi tanama naatu anihamiyi maiye anan, ayu akokok i boro anan vey a maninaka bairit

^w 15.51-52 Mat 24.31; 1Th 4.15-17 ^x 15.53 2Cor 5.4 ^y 15.54 Isa 25.8 ^z 15.55 Hos 13.14 ^a 15.56 Rom 7.13 ^b 16.1 Rom 15.25-26; 2Cor 8.1-9 ^c 16.5 Act 19.21

^d 16.6 Rom 15.24

tanama, Regah nabibasit na'at. ⁸Baise ayu boro Ephesus imaim anama nanan *Pentecost* ana veyatit. ⁹*e*Anayabin bowabow anabatun ana etawan gagamin isou botawiy naatu sabuw mounurhika i ayu isou i mo'oh te'a'abar.

¹⁰*f*Timothy ef aumatan nanan biya natitit na'at ana merar kwanay saise biyan fari niwa'an, anayabin i Regah ana akir wairafin orot, ayu na'atube. ¹¹*g*Men yait ta ina nuwfurubimih, baise kwanibais tufuwamaim ana remor nakofan nan, saise namatabir nan biyou natit. Anayabin ayu baitumatumayah afa bairi i ana matabir maiye isan ama anuwauw.

¹²*h*Naatu taituwa Apollos isan mar bai'ab koufair aitin baitumatumayah afa bairi hitan hitananawani isan, nuhin tutufin men botabir boro boun ana veyatamaim tan, baise aren ta nabaib na'at boro nan.

Tur Yomanin

¹³Mata toniwa'an, baitumatumamaim kwanabatkikin, naatu kwana'abar totofar, kwanafair kwanabat. ¹⁴A bowabow etei yabowamaim kwanabow.

¹⁵*i*Kwa Stephanas aawan natunatun bairi isah i kwaso'obaka, Akaiya wanawanamaim i mat hina Kirisiyan himatar naatu taiyuwih hiyasairih hitit God ana sabuw isah hibow, isan taitu, kwa abifefeyani, ¹⁶bonawiyenayan sabuw iti na'atube i kwani'u'urih naatu sabuw iyabowat iti bowabow wanawanan hirun hikofanib bairi tebowabow auman. ¹⁷Ayu i abiyasisir, Stephanas, Fotunatus naatu Akaikas hinan isan, anayabin kwa yumat aboboyouw efanin i hina ayu hibaisu. ¹⁸Naatu ayu au naniyan hikura'ah amisir, kwa hikukura'ahi na'atube. Sabuw iti na'atube i kwana'inanib a notamaim hinama.

Merarayow Naatu Koufair Tur

¹⁹*j*Ekaleisia Asia tutufin wanawanan kwa a merar tiyiy, Aquila Priscilla hairi naatu ekaleisia iyabowat i hai baremaim bairi tibita'ay kwa a merar tiyiy Regah wabinamaim. ²⁰Taituwa baitumatumayah etei iti'imaim tema'am kwa etei a merar tiyiy, naatu tufuw ana baimamamayen kwanimerarayowbonen kwanama. ²¹Ayu Paul taiyuwu umou'umaim iti a merarayow ana fef akirum abiyafar. ²²*k*Yait Regah men nabiyabuw, o rarafen tafanamaim nayan. "*Maranatha*," Anayabin O Regah kuna. ²³Ata Regah Jesu ana manaw ana kabeber mar etei biyamaim nama. ²⁴Keriso Jesu wanawanamaim kwama'am etei'imak abiyabuwi. *Amen*.

^e 16.9 Act 19.8-10; 2Cor 2.12 ^f 16.10 1Cor 4.17 ^g 16.11 1Tim 4.12 ^h 16.12 1Cor 3.6

ⁱ 16.15 1Cor 1.16 ^j 16.19 Act 18.2, 18, 26 ^k 16.22 Gal 1.8-9; Rev 22.20